

# Malueng ako Jut i wat i Jut

## Ritetong nge a Jut

Ava Jut aka i wat malueng ake ini a Jisas iteinnga (O thepol a Matiu 13:55 na Mak 6:3) na ini a Jems itein mun. (1:1 na o thopol mun ritetong nge a Jems) Na riong pulua aka i voth a malueng ake lemi i ranga ve ini riong pelie aka i voth a 2 Pita 2:1-22. Na nge wop lemi aken, tokokoe areko o kerenga rintet o supo tomo nge toko lemioongare nge lotu, na o eksing Panongpolong Sivenga na o ri ve, i sivenga aka aro toko lemioongare o oma vothung kerenga. (1:4) Aveto Jut i palemi rumal toko lemioongare ve, i pavurvur aka aro Panongpolong Sivenga i eksing avele. (1:3) Na i rirum nge tenesing pelie aka o voth a God ile erere nomenganga mo i pathengal aka ve, God aro i paomelal tokokoe areko o panes vothung kerenga venen aken. (1:5-16)

---

## Aro thomu o naktet lomu lemioong, na o lel kimomu nge areko ole ngarang tomo nge Panongpolong Sivenga

<sup>1</sup> Tho a Jut aka ini a Jisas Krais itein nunganga na tho ini ile toko umonga, na tho ini a Jems<sup>a</sup> itein nunganga mun.

Tho wat malueng ake a thomu areko God i lengpot thomu lale ve ini ile, na o voth a ar Vovo a God ile asaguong lemi tomo mun nge a Jisas Krais ile thealing lemi.

<sup>2</sup> Na tho nong ve aro God ile themosaling na ile lemi moring tomo mun nge ile asaguong aro i vual rintet a thomu nge.

---

<sup>a</sup> **1:1** Jut na Jems na Jisas oa nina ini a Maria, na Jems ini a Jisas Krais ile pakeke na ini toko lemioonga areko o voth a Jerusalem oa pomnga.

**O naktet thomu nge pamirealonga le apaltetongare  
ako o voth tomo nge thomu.**

<sup>3</sup>Titeik sivengare, tho sis rintet ve aro tho wat a thomu nge, nge pamimiong ako it alavusnga te el i, aveto riong pelie i oma tho ma lemeki ve aro tho wat ol vene: Aro tho pator thomu ve aro o mit engeng nge ur areko lomumuo nge lale, na o pun tomo nge pamirealonga le apaltetongare, eneke Panongpolong Sivenga aka lomumuo nge, i eksingu eksinga avele, God i sungu i pa omole inga a ile tokokoere nge. <sup>4</sup>Naro thomu o mit engeng venen aken, eneke toko pelie aka o lel okime nge a God, o re wolteto a thomu nge lale. Na nomenga God ile erere i ritet nge paomelaling aka aro o el i. Na o eksing ler God ile themosaling, ma o ri ve aro te oma inga vothung aka nge toko na seng aomnga na vothung kerenga mun pelie, eneke o ri ve God i pamimi it aken nge ile themosaling inga. Aveto o lel okime nge a Jisas Krais aka ienga inga ini ar Pomnga na ini ar os.

<sup>5</sup>Na i nunganga aka lomumu i nine nge ur areke, aveto tho sis ve aro tho palemi rumal werer thomu nge ur aka Toko Pomnga i oma i, aka i el werer Israelre a Isip me, aveto palolo avele, nako i pakerenga oa pelie aka olemio nge i avele. <sup>6</sup>Na e mun e aka nge ensel pelie aka God i paeso toko pelie a osa thewo, ave o voth pis nge ole menong aken avele, aveto o lo lelpot nge ole pen aka God i pamenu or nge, mako God i kino or nge sen, na i paeso or a paomelalinga a pen aka ia midingdeng. Naro o voth venen aken evelelnga i mulal nge nang pomnga aka aro o mit nge riong a God itheki. <sup>7</sup>Na Sodom ome a Gomora angare tomo nge areko o voth toth a or nge, ole vothung i ranga ve ini ensel areken ole vothung, nge aka o engeng inga nge toko na seng aomnga, na vothung aka i kerenga rintet nge aken, ini ole vothung aka o sis ve aro o ngo tomo nge areko osivanga i rel nge or. Na paomelaling aka o el i, ini won sesenga aka aro ile vusonga avele. Na aken ini patongrumong nge areko aro o el paomelaling a God nge.

<sup>8</sup>Aveto pamirealonga le apaltetongare aka o voth tomo nge thomu o venen aken mun. Ole oni theong i oma or, mako o oma pelekpol oni peti, na oni plong rintet ve aro o voth a mukalinga e isa thewo, na o voltet tamatare aka o voth roro nge or. <sup>9</sup>Aveto enselre ole mukalinga aka ini a Maikel i oma venen aken avele. Nomenga nge aka i ri tomo nge a Satan, na or paini o pun pel nge riong aka nge a Moses ini peti elnga, na ilemi ve, aken ini ile omaing avele aka aro i vol a Satan mo i teltun ia, mako i ri vene, “Toko Pomnga aro i vol ong.” <sup>10</sup>Aveto pamirealonga le apaltetonga areken o vol ur areko olemi mire nge avele. Na o ranga ve ini mekerem wengare aka ole mire avele, na o panes inga ur aka i mita a olemi me, na ole vothung aken aro i pakerenga or.

<sup>11</sup> Patong or! Eneke o panes a Kein<sup>b</sup> ile vothung ako i so rin itein. Na o sungpot osivenga ole mimiong nge umtun elnga ranga ve ako Balam<sup>c</sup> i oma i. Na o ri pompom nge ole mukalingare ranga ve ako Kora<sup>d</sup> i oma i, naro o el kerengaing nge, ranga ve ako Kora i el i.

<sup>12</sup> Na or ini toko akopngare ako o pavelpol le maraing a thomu nge, eneke ole mara avele nge ole vothung kerenga areken omanga nge ako o an tomo nge thomu toko lemioongare, nge omu aning ako i patheng lomu asagupeling. Na nge aning aken olemi voth inga nge osivenga oopo lemia. Na o ranga ve ini vit theki aka thue engenga i thutet i na vit i mol ol avele. Na o ranga ve ini won areko o mon avele nge ole moning po. Na o ranga ve ini won menengare ako o rin lale na o lelrisa i. <sup>13</sup> Na ranga ve ini rua loliknga le punong aka i pavelpol mesmes akopnga a rua wo peti elonga, tokokoe areken o pesrou nge vothung le marainga omanga avele, na o pango pat ol i a tokokoere nge venen aken. Na o ranga ve ini mun i topoa areko o mopespot, na palolo avele na o eso a paomelalinga a pen aka ia midingdeng aka God i monsi lale, naro o voth ol nge evelelnga aka aro ile vusonga avele.

<sup>14</sup> Na Adam itun itevinga itun itevinga ini a Enok ini a God ile riong elnga aka i ritet nomenga nge pamirealonga le apaltetonga areken na i ri vene, “O thepol, Toko Pomnga aro i es tomou me nge ile ensel riringare or tausen pulua, <sup>15</sup> mo aro i pamit toko alavusngare nge riong. Naro i teltun areko o lel okime nge a God, nge ole vothung kerenga areko o oma i nge aka o panes a God avele. Naro i teltun mun oa nge ole riong kerenga areko o ri tangatun nge a God.” Na aken ini a Enok ile riong aka i ritet nge. <sup>16</sup> Na riong aken i ri nge pamirealonga le apaltetonga areko o voth tomo nge thomu. Na or ini tokokoe areko o ri pompom, na okei palil, na o panes inga vothung kerenga areko oni peti i vurpoltun i, na owo a thei aolo rin nge osivenga, na o pamolomolotun toko na sengre mo o opoal osivenga.

### Aro thomu o mit engeng nge lomu lemioong na nge matheong potunnga.

<sup>17</sup> Aveto titeik sivengare, aro lomumu rum senu nge riong aka ar Pomnga a Jisas Krais ile pakekere o ritet i a thomu nge lale, <sup>18</sup> aka o ri ve, “Nge nang patopalalnga, tokokoe areko o ri sililal nge thomu aro o velpol, naro o panes inga vothung kerenga areko oni peti i vurpoltun i, na nge aken o lel okime nge a God ipanesnga.” <sup>19</sup> Na or ini tokokoe areko o pavelpol omreupeling, na o panes inga vothung ulue anga, na Oni Riringa i voth a or nge avele.

<sup>b</sup> 1:11 O thepol a Stat 4:3-8.    <sup>c</sup> 1:11 O thopol tenesing nge a Balam aka a Namba 22-24.

<sup>d</sup> 1:11 O thepol a Namba 16.

<sup>20</sup>Aveto thomu titeik sivengare, aro thomu o paengeng lomu mitong nge lomu lemioong ako i riri rintet. Naro thomu o panes inga Oni Riringa ilemi nge lomu nongong. <sup>21</sup>Aro thomu o voth inga nge a God ile asaguong lemi, nge ako o menetal ar Pomnga a Jisas Krais ve aro i sungu mimiong aka aro ile vusonga avele a thomu nge, aka a ile themosaling lemi. <sup>22</sup>Na toko pelie rongan oleli sulung salang nge ole lemioong, aro thomu o themosal or. <sup>23</sup>Na ranga ve aka toko mun pelie o mata ol a won sesenga nge, aro thomu o titpoa or mo o el mimiong. Na toko mun pelie ole vothung i kerenga selele na i ranga ve ini ole teunong aka i akop rintet, aro lomumu esal or, aveto aro o naktet senu thomu, aro vene mo ole vothung akopnga aken aro i teo mun a thomu nge.

**Aro te risea a God iion roro.**

<sup>24</sup>Na God i pavurvur nge thealngomu aka aro thomu o matu avele. Na i pavurvur mun aka aro i pamensenu thomu a itheki mo o thepol ia malmaling Pen a Urvet anga. Na nge ile pamensenuong aken omu theki e avele. Aken aro thomu o pesrou nge iriseanga avele. <sup>25</sup>Na ienga inga ini a God na ini ler Pamimionga. Naro te risea i aka nge ler teoong a ar Pomnga a Jisas Krais nge, eneke malmaling a urvet i voth a i nge, na i pomnga rintet, na ile engenging i aolonga rintet, na ur alavusnga o voth a isa thewo. Na ur areko o voth a i nge venen aken nomenga vet ako me, na ponange, naro i voth evelelnga venen aken a i nge aka aro ile vusonga avele. I nunganga.

Na i re aken. I vus.